



# NEWSLETTER

## OLIMPIJSKOG KOMITETA BIH



No.16 oktobar/decembar 2022



Poštovani sportisti i sportski radnici,  
Dragi prijatelji,

Globalno, iza nas je izazovna godina. Svijet i prilike se mijenjaju, čemu svi svjedočimo, te kreiraju nimalo jednostavne životne putanje. Svijet sporta nas je naučio da nam glava nikada “ne visi dolje”, nego da tražimo druge načine, puteve, da nikada ne odustanemo.

Prisjetimo se, početkom mjeseca decembra 2022. godine održali smo 11. Izbor sportiste godine u našoj organizaciji. Prisjetili smo se i proslavili velike uspjehe bh. sportista i timova, ali i sportskih radnika, te svih pojedinaca i kolektiva zaslužnih za unaprijeđenje i razvoj sportskog sistema Bosne i Hercegovine.

No, da li je to dovoljno? Šta je to što sistemski (ne)činimo, a možemo?

Koliko smo zaista, sistemski, usmjereni na vrhunski sport u Bosni i Hercegovini?

Kao što je poznato, mi, Olimpijski komitet Bosne i Hercegovine, kao nebudžetski korisnik evidentno vršimo stipendiranje potencijalnih sportista za kvalifikaciona takmičenja i pripreme za Olimpijske igre. Stipendiramo takmičare za pripreme za višesportska međunarodna takmičenja u organizaciji EOK-a i MOK-a kroz kontinentalne grantove. Vanserijskim naporima unaprijeđujemo sportski sistem kroz projekte Evropske unije, projekte izgradnje sportskog sistema, projekte podrške timskim sportovima i mnogim drugim aktivnostima.

Ali ne možemo sami. Zaboravljamo, da bez sistemskog rješenja, nema dugoročnog rješavanja problema, kako u životu, tako i u sportu, jer „ništa se rađa iz ničega.“

Smatramo da smo, još od osnivanja Olimpijskog komiteta BiH, u ovoj godini započeli jednu od najvažnijih kampanja za rješavanje sistemskog finansiranja vrhunskog sporta u Bosni i Hercegovini. Shvatili smo da je vrijeme da „podignemo glas“ i zajedno sa najvećim ambasadorima naše zemlje, najboljim sportistima i krovnim sportskim savezima, determinišemo se ka rješavanju ove problematike. Važno je otvoriti dijalog, ne vraćati se na prošlost, nego usmjeriti snagu i znanje na kvalitetna rješenja ovog problema, te upozoriti politički sistem Bosne i Hercegovine u serioznost istog.



# NEWSLETTER

## OLIMPIJSKOG KOMITETA BiH

No.16 oktobar/decembar 2022

Ne trebamo mi držati lekcije o uspjesima naših sportista, o mladim nadama, oni su evidentni, ali ako se sistem ne pozabavi njima, ne zaštiti ih, ne pozicionira, ostat će zaglavljani, jer „ne utapamo se skakanjem u rijeku, nego ako ostanemo potopljeni u njoj.“

Kao što Emerson reče: „Može li iko da se sjeti, kada to vremena nisu bila teška i kada to novaca nije bilo malo?“ Ne zaboravimo da je društveno-ekonomski kontekst determinisan i načinom funkcionisanja materijalne podrške sportskom sistemu. Tako da gdje ima volje, uvijek je bilo i načina. Istina je da mnogima mnoge stvari na početku izgledaju nemoguće, sve dok se ne završe.

Upravo su to sjajni primjeri naših vrhunskih sportista. Kada oni mogu da stvaraju ovakve rezultate pored systemske nesavršenosti, onda i sistem može pronaći jedinstven način za njihovu systemsku potporu.

Iskreno se nadamo i vjerujemo da će novi plivni, politički val početi sa novom paradigmom promjena ka vrhunskom sportu. Da će konačno čuti i saslušati do kraja probleme i krenuti sa strateškim promišljanjem. Samo zajedničkim snagama i podrškom možemo omogućiti našim vrhunskim sportistima uslove za ostvarivanje historijskih rezultata na ljetnim i zimskim olimpijskim igrama – OI Pariz 2024 i ZOI Milano Cortina 2026. Ne smijemo zaboraviti naše mlade nade, naše buduće naraštaje čije vrijeme tek dolazi.

Vođeni olimpijskim sloganom „CITIUS - ALTIUS - FORTIUS“, vrijeme je za istinsko buđenje.

Koristim ovu priliku da u ime Olimpijske porodice Bosne i Hercegovine čestitam novogodišnje praznike, uz želju da Nova 2023. godina bude uspješna i prosperitetna!

Akademik Izet Rađo

Potpredsjednik OK BiH



## ODRŽAN OKRUGLI STO NA TEMU „ SISTEMSKO FINANSIRANJE VRHUNSKOG SPORTA BOSNE I HERCEGOVINE



U prostorijama Olimpijskog komiteta BiH 30.11.2022. godine na Okruglom stolu se okupilo oko pedeset predstavnika sportskih saveza BiH, olimpijaca, predstavnika pojedinih ministarstava i predstavnika medija.

Okrugli sto je počeo sa uvodnim izlaganjem predsjednika OK BiH prof. dr. Milanka Mučibabića i prezentacijom kojom je obuhvaćeno aktuelno stanje sistemskog finansiranja sporta u Bosni i Hercegovini iz koje se vide mnogobrojne

anomalije i nedostaci, odnosno kompletno odsustvo organizovanog i sistemskog finansiranja vrhunskog sporta u našoj državi.

Nakon prezentacije za riječ su se javili učesnici Okruglog stola, koji su izrazili veliko negodovanje postojećeg načina finansiranja koje dovodi u pitanje egzistiranje vrhunskog sporta u Bosni i Hercegovini.

„Sport je proglašen Javnim interesom za BiH i kao takav mora biti adekvatno finansiran“, rekao je predsjednik OK BiH prof.dr. Milanko Mučibabić.

Za riječ su se javili i predstavnici Sportskih saveza BiH koji su istakli :

Svjedoci smo da već tri puta za deset godina nemamo usvojen Državni budžet, a i kada je usvojen, grant za vrhunski sport je statistička greška u odnosu na prosjek Evropske Unije koji iznosi 1% od ukupnog državnog budžeta. Također u skladu sa postojećim kriterijima, vrhunski sportisti, sportski savezi BiH i Olimpijski komitet BiH, dobijaju minimalan dio iz grantova namijenjenih sportu, te se na iste može prijaviti bilo koje udruženje koje se bavi sportom, pa čak i na rekreativnoj osnovi. Kao posljedicu svega ovoga, najbolji sportisti BiH nemaju adekvatne uslove za bavljenjem sportom, te odlaze iz BiH i bore se pod drugim zastavama. Najveća zamjerka je minimalan ili nikakav budžet na državnom nivou kao i na ostalim nivoima administrativnog organizovanja BiH.“



Na Okruglom stolu, sportski radnici su također komentarisali i izrazili veliko negodovanje po pitanju nepostojanja sistemskog finansiranja mladih olimpijskih nada, potencijalnih i evidentnih olimpijaca.

Učesnici Okruglog stola su također izrazili neslaganje po pitanju nagrađivanja za ostvarene sportske rezultate na evropskom i svjetskom nivou, kao i za nacionalne sportske penzije koje su minimalne i neusklađene na cijeloj teritoriji BiH.

Nakon dvosatne i konstruktivne diskusije svih učesnika Okruglog stola doneseni su sljedeći zaključci na kojima će se u kontinuitetu insistirati kod nadležnih Ministarstava ili tijela i to da se:

- Uveća budžet za sport na svim nivoima vlasti BiH u skladu sa prosjekom Europske unije koja iznosi 1% od ukupnog državnog što bi na državnom nivou iznosilo minimalno 10 miliona KM.
- Usvoje adekvatni kriteriji za dodjelu sredstava, gdje sredstva sa državnog nivoa trebaju biti isključivo namijenjena za Olimpijski komitet BiH, Sportske saveze BiH i Paraolimpijski komitet BiH, što preporučujemo i entitetskim nivoima. Sredstva bi se koristila za pripreme, nastup i nagrade reprezentativnih selekcija ili reprezentativaca (olimpijaca).
- Da sredstva moraju biti operativna najkasnije od 01.01. za predstojeću godinu, a ne u decembru kada su gotovo sva takmičenja i aktivnosti završene.
- Da se izdvoje značajna sredstva od igara na sreću, a posebno SPORTSKIH KLADIONICA koje koriste sport, sportiste i sportske manifestacije kao osnovno sredstvo funkcionisanja i izvor dobiti.
- Izdvoje adekvatna sredstva za program „Podrška mladim olimpijskim nadama“ na svim nivoima vlasti BiH.
- Izdvoje adekvatna sredstva za program „Podrška za vrhunske sportiste“ koja bi se usmjerila prema potencijalnim olimpijskim kandidatima i olimpijcima Bosne i Hercegovine.
- Formira jedinstven sistem nagrađivanja za vrhunske rezultate na državnom, odnosno entitetskim nivoima ostvarenih na olimpijskim igrama, evropskim i svjetskim prvenstvima.
- Napravi jedinstven sistem za dodjelu identičnih naknada na nivou BiH – nacionalnih sportskih penzija za sve vrhunske sportiste.
- Traži se usvajanje Strategije razvoja sporta BiH - dokument je spreman.





## KAMPANJA OK BIH ZA SISTEMSKO RJEŠAVANJE FINANSIRANJA BH. SPORTA

Nakon održanog “Okruglog stola” na temu “Sistemske finansiranje vrhunskog sporta u BiH” oglasili su se mnogi vrhunski sportisti komentarišući ovaj višedecenijski problem. Poruke naših olimpijaca i vrhunskih sportista možete poslušati klikom na sliku.



## TAEKWONDO SAVEZ BOSNE I HERCEGOVINE PRUŽIO PODRŠKU KAMPANJI OLIMPIJSKOG KOMITETA BOSNE I HERCEGOVINE

Taekwondo savez Bosne i Hercegovine je također uputio podršku Olimpijskom komitetu Bosne i Hercegovine za sistemsko rješavanje finansiranja vrhunskog sporta u BiH. Predsjednik Taekwondo saveza BiH Samir Šarić ističe kako lokalne zajednice podržavaju sport na razne načine, ali da je ove stvari potrebno sistemski riješiti na nivou države.

“U potpunosti pružamo podršku Olimpijskom komitetu BiH u borbi za bolje uslove sporta i sportista u našoj državi. Smatramo da je sistemsko finansiranje među prioritetima za dobrobit i poboljšanje cjelokupnog sporta, te pozivamo sve sportske saveze u BiH da pruže podršku Olimpijskom komitetu BiH. Finansiranje vrhunskog sporta potrebno je riješiti kako bi sportisti koji predstavljaju državu na najprestižnijim takmičenjima imali adekvatne uslove, te da bi mogli biti fokusirani na sportski rad i rezultat, umjesto što moraju razmišljati hoće li uopšte moći otići na određeno takmičenje.” Kompletno saopštenje za javnost pročitajte na linku [OVDJE](#).



## KAMPANJA OK BiH ZA SISTEMSKO RJEŠAVANJE FINANSIRANJA BH. SPORTA | Čelnici OK BiH u posjeti predstavnicima Predsjedavajuće Predsjedništva BiH Željke Cvijanović



22. decembra 2022. godine u kabinetu Predsjedavajuće Predsjedništva BiH Željke Cvijanović čelnike Olimpijskog komiteta BiH, predsjednika prof. dr Milanka Mučibabića, potpredsjednika akademika prof. dr Izeta Rađu i generalnog sekretara doc.dr Saida Fazlagića primili su u radnu posjetu šef kabineta Dušan Petrović i savjetnik u kabinetu Mario Đuragić.

Na sastanku su čelnici OK BiH upoznali predstavnike Predsjedavajuće Predsjedništva BiH Željke Cvijanović sa trenutnim stanjem bh. sporta i sportskog sistema, uspjesima naših vrhunskih sportista i timova, ali i potrebama sportskih saveza BiH i vrhunskih sportista u finansijskom smislu kako bi ostvarili ove rezultate.

Poseban fokus razgovora i diskusije je bio na zaključcima/zahtjevima sa Okruglog stola na temu „Sistemsko finansiranje vrhunskog sporta BiH.”

Čelnici OK BiH su naišli na veliko razumjevanje i zainteresovanost iz kabineta Predsjedavajuće Predsjedništva BiH u smislu upoznavanja sa problematikom finansiranja, ali i sistemskog rješavanja finansiranja vrhunskog sporta BiH u skladu sa zaključcima Okruglog stola.

Olimpijski komitet Bosne i Hercegovine će nastaviti sa radom u cilju implementiranja zahtjeva Okruglog stola koji se odnose na poboljšanje uslova za naše vrhunske sportiste i finansiranje vrhunskog sporta,” zaključio je predsjednik Olimpijskog komiteta Bosne i Hercegovine prof. dr Milanko Mučibabić.





## 11. IZBOR SPORTISTE GODINE U ORGANIZACIJI OLIMPIJSKOG KOMITETA BOSNE I HERCEGOVINE

### *Lana Pudar je najbolji sportista u 2022. godini u organizaciji Olimpijskog komiteta Bosne i Hercegovine*

U svečanom ambijentu multimedijalne sale Olimpijskog komiteta BiH i uz direktan TV prenos na FACE TV 08.12.2022. godine je održana 11. po redu manifestacija "Izbor sportiste godine" u organizaciji Olimpijskog komiteta Bosne i Hercegovine.

Izbor sportiste 2022. godine održan je u prisustvu najeminentnijih lica bosanskohercegovačkog sporta i sportske javnosti.

Ispred Olimpijskog komiteta Bosne i Hercegovine prisutnima se obratio Predsjednik OK BiH, prof.dr Milanko Mučibabić koji je sublimirao dosadašnje događaje Olimpijskog komiteta BiH istaknuvši: „Vrhunski sportisti su u organizaciji OK BiH učestvovali na 4 višesportska međunarodna takmičenja sa kojih su donijeli 9 medalja. Bh. olimpijska porodica je uvjeren da bi rezultati vrhunskih bh. sportista bili znatno bolji kada bi se državne institucije nadležne za sport aktivnije uključile u rješavanje sistemskog finansiranja vrhunskog sporta u BiH. Ovo je prilika da se zahvalimo sportistima, trenerima, sportskim savezima, ljudima dobrog srca, i našim sponzorima. Hvala svima sa porukom 'Nastavit ćemo proaktivno djelovanje u ostvarivanju ciljeva, misije i vizije Olimpijskog pokreta BiH na opštu dobrobit bh. sporta'“.

Za sportistu 2022. godine proglašena je naša trenutno najbolja plivačica Lana Pudar.



Lana nije bila u prilici lično preuzeti nagradu, ali se obratila putem videa: „Velika je čast i zadovoljstvo biti proglašen najboljim sportistom Bosne i Hercegovine u 2022. godini. To je san svakog sportiste. Hvala svima koji me podržavaju u ostvarenju mojih sportskih ciljeva, a posebnu zahvalnost dugujem svojoj porodici i prijateljima. Hvala vam!“

Olimpijski komitet Bosne i Hercegovine će nastaviti sa svojim predanim radom u jačanju bh. sporta i sportskog sistema, a ovogodišnjom organizacijom 11. izdanja izbora sportiste godine pružen je dodatni podstrek bh. sportistima i sportskim radnicima, kroz promociju njihovih rezultata i životnih djela.



Dobitnici nagrada i priznanja u svim kategorijama su:

**Najbolja mlada sportistkinja u kategoriji juniorki**

Marija Jokić - taekwondo i Iman Avdić - plivanje

**Najbolji mladi sportista u kategoriji juniora**

Nino Šeremet – taekwondo

**Najuspješniji Sportski klub**

Klub vodenih sportova “ORKA” Mostar

**Najuspješnija Reprezentacija Bosne i Hercegovine**

Ženska košarkaška reprezentacija BiH

**Najuspješniji trener**

dr. Goran Grahovac - trener Lane Pudar



**Specijalne nagrade OK BiH**

Za promociju sporta i Olimpijskih vrijednosti

Sara Bećarević – gimnastika

**Sportski radnik, za dugogodišnji doprinos u razvoju sporta**

Miro Klepić - karling

Milan Pedalo - atletika

Mirsad Pajević – stoni tenis

Ibrahim Kolja - taekwondo





**Promotori sporta Bosne i Hercegovine**  
SFK 2000 Sarajevo  
Nikolina Čolak –  
Cheerleading  
Gimnastički klub  
“Olimp”  
Vaterpolo klub “Banja Luka”

**Sportista ili ekipa iz porodice neolimpijskih sportova**

Pavle Dujaković - karate  
Emina Sipović - karate  
Adis Jakić - natural bodybuilding & fitness

**Posebna nagrada za istaknuti sportski rezultat**  
Reprezentacija BiH u sjedećoj odbojci  
Seniorska Teniska Davis Cup reprezentacija BiH

**Nagrada za podršku u radu OK BiH**  
Sponzori OK BiH - (BH TELECOM, Lutrija BiH, Sarajevo osiguranje i Number 1)

**Nagrada za medijsku promociju olimpijskih vrijednosti**  
Almir Sokolović - Radio Sarajevo  
Sabahudin Topalbećirević

**Za uspješan dugogodišnji trenerski rad**  
Dragomir Čabrilo - atletika  
Fazlija Nedžad - streljaštvo  
Zijad Sipović – karate

**Za doprinos razvoju sporta BiH**  
Midhat Kabahija  
dr Zdenko Klepić  
Rade Unčanin

**Ambasador sporta**  
Džanan Musa - košarka



**Najbolja sportistkinja u seniorskoj konkurenciji**  
Lana Pudar - plivanje

**Najbolji sportista u seniorskoj konkurenciji**  
Nedžad Husić - taekwondo

**SPORTISTA GODINE: Lana Pudar - plivanje**






## TEHNIČKI KURS ZA TRENERE 2022 | NAUČNO UTEMELJENI PRISTUP TRENERSKOM POZIVU

Olimpijski komitet Bosne i Hercegovine pod pokroviteljstvom Olimpijske solidarnosti Međunarodnog olimpijskog komiteta organizovao je još jedan u nizu edukativnih događaja - jednodnevni Tehnički kurs za trenere na temu 'Naučno utemeljeni pristup trenerskom pozivu.'

Edukacija je realizovana u prostorijama OK BiH u subotu 17.12.2022. godine, u saradnji sa Internacionalnom akademijom nauka i umjetnosti u Bosni i Hercegovini i Verlab Institutom.



Više od sedamdeset bosanskohercegovačkih trenera imalo je priliku slušati predavanja i učiti od renomiranih regionalnih i domaćih stručnjaka. Edukaciju je otvorio Predsjednik Olimpijskog komiteta BiH, prof. dr Milanko Mučibabić koji je poželio dobrodošlicu predavačima, gostima i učesnicima te izjavio da će OK BiH nastaviti permanentnu edukaciju u svim oblastima sporta, a posebno rada sa trenerima, sportskim radnicima, sportistima i svima koji doprinose razvoju i napretku sporta u Bosni i Hercegovini. "Pored niza aktivnosti i područja djelovanja, opredjeljenost Olimpijskog komiteta Bosne i Hercegovine je da proaktivno djeluje kao krovna sportska institucija u oblasti svrsishodne edukacije sportskih radnika. Multidisciplinarnе edukativne aktivnosti, sinergija naučne teorije i prakse je osnova za razvoj i budući napredak bh. sporta. Krajnji cilj edukativnih aktivnosti sportskih radnika jeste primjena novih znanja i vještina u neposrednom radu sa sportistima i bh. reprezentacijama," izjavio je predsjednik OK BiH prof. dr Milanko Mučibabić.





## TEHNIČKI KURS ZA TRENERE 2022 | NAUČNO UTEMELJENI PRISTUP TRENERSKOM POZIVU



Učesnici su imali posebnu čast da u uvodnom obraćanju i predavanju slušaju akademika prof. dr Asima Kurjaka koji je održao predavanje na temu: "Znanost i olimpijski duh u zajedničkoj bitci za psihičku stabilnost i mentalno zdravlje." Akademik Kurjak je istakao važnost naučno zasnovanog rada u trenerskoj struci i uopšteno sportu kao društvenom fenomenu. "Sa izuzetnim zadovoljstvom sam se odazvao pozivu za predavanje krovne sportske institucije, Olimpijskog komiteta Bosne i Hercegovine. Znanje je osnova i zalag za budućnost, a znanstvena dostignuća i sport

su neodvojivo vezani. Zajedničkim djelovanjem, nauka i sport unapređuju mentalno i fizičko zdravlje svih generacija i u konačnici sveukupno zdravlje društva," naglasio je akademik Kurjak.

**PREDAVAČI TCC 2022 bili su:**

**Akademik prof. dr Izet Rađo:** Nove tehnologije u sportu;

**Akademik prof. dr Velimir Srića:** Učenje od liderskih konsultanata;

**Akademik prof. dr Almir Badnjević:** Primjena vještačke inteligencije u predviđanjima sportskih performansi;

**dr Zoran Milošević:** Promocija univerzalnih olimpijskih vrijednosti kroz sport;

**dr Tamer Bego:** Genetski uticaj na sportske performanse: aktuelni izazovi i budući pravci u identifikaciji talenta za sport;

**sci. Nazif Hasanbegović:** Upravljanje trenerskim karijerama.

Akademik prof. dr Izet Rađo, potpredsjednik OK BiH, moderator i voditelj edukativnih projekata Olimpijskog komiteta Bosne i Hercegovine istakao je da timski rad čini osnovu svakog uspjeha, a posebno u sportu. "Neophodno je da stručni pristup u radu sa sportistima bude zasnovan na naučnim dostignućima i multidisciplinarnoj saradnji institucija i pojedinaca," istakao je akademik Rađo.

Svi učesnici su dobili certifikat Međunarodnog olimpijskog komiteta.





Tokom posjete predavača TCC 2022 Olimpijskom muzeju, iskoristili smo priliku za kratke, nadahnute razgovore o olimpizmu, olimpijskim vrijednostima i olimpijskom duhu. Klikom na slike ispod, poslušajte podcaste sa akademikom prof. dr Asimom Kurjakom, akademikom prof. dr Velimirom Srićom i prof. dr Zoranom Miloševićem.



Takođe, na [YouTube](#) nalogu OK BiH možete pogledati sva predavanja održana tokom Tehničkog kursa za trenere “Naučno utemeljeni pristup trenerskom pozivu.”

## POTPISAN SPONZORSKI UGOVOR SA RENOMIRANOM KOMPANIJOM NUMBER1

Olimpijski komitet BiH je nastavio uspješnu saradnju sa renomiranom kompanijom, prepoznatljivim bh. brendom i ekskluzivnim proizvođačem sportske opreme “Number1” iz Travnika.

U prostorijama Olimpijskog komiteta BiH generalni direktor kompanije „Number1“ mr.sci.dr.Nihad Selimović i predsjednik OK BiH prof. dr Milanko Mučibabić potpisali su Ugovor u prisustvu potpredsjednika OK BiH akademika Izeta Rađe i Marijana Kvesića, te Generalnog sekretara i članova Izvršnog komiteta OK BiH.



Naredne četiri godine naši najbolji sportisti, olimpijci i bh. timovi nosit će svečanu sportsku opremu ovog brenda na svim višesportskim takmičenjima u organizaciji Olimpijskog komiteta BiH.

“Koristim ovu priliku da se zahvalim kompaniji Number1 na sponzorstvu i društvenoj odgovornosti koju pokazuju nesebičnim doprinosom sportskom sistemu i olimpijskoj zajednici BiH. Naše selekcije i Olimpijci će sa ponosom i radošću nositi ovu opremu širom svjetskih borilišta i naredne četiri godine” zaključio je predsjednik OK BiH prof. dr Milanko Mučibabić.



## OK BIH ORGANIZOVAO PRIJEM OSVAJAČA MEDALJA SA VIŠESPORTSKIH TAKMIČENJA U ORGANIZACIJI OK BIH 2022

Predsjedništvo OK BiH i Izvršni komitet OK BiH primili su naše najbolje sportiste, osvajače medalja sa MI "Oran 2022" i EYOF "Banska Bistrica 2022". Prijemu je prisustvovala naša najbolja plivačica Lana Pudar koja je nakon dvije zlatne medalje osvojene na Mediteranskim igrama u Oranu, odmah zatim, u svoju kolekciju medalja uvrstila i historijsku zlatnu medalju sa Evropskog prvenstva za seniore u Rimu. Pored Lane prijemu su prisustvovali i osvajači bronzanih medalja sa Mediteranskih igara u Oranu, iz džudoa Larisa Cerić, Anđela Samardžić, Toni Miletić, karatea, Hamza Turulja i Rijad Džuho, te naša mlada i perspektivna plivačica Iman Avdić koja je osvojila bronzanu medalju na EYOF-u Banska Bistrica 2022. Također su bili prisutni treneri i selektori Damir Đedović, prof.dr. Branislav Crnogorac, Asmer Šeta, Šejla Sipović i Evelin Avdić.



Predsjednik OK BiH prof.dr Milanko Mučibabić je rekao: "Danas je posebna prilika u ovoj kući sporta, jer smo na jednom mjestu okupili najbolje sportiste, osvajače medalja u 2022.g. Naši sportisti su nam pokazali da je njihov naporan rad i posvećenost rezultirao izvanrednim rezultatima i osvojenim medaljama, što je Olimpijski komitet BiH podržao."

Kompletnu vijest pročitajte na linku [OVDJE](#).

## NAGRADA ZA OSTVARENI REZULTAT | NEDŽAD HUSIĆ

Odlukom Izvršnog komiteta Olimpijskog komiteta Bosne i Hercegovine, a shodno svojim mogućnostima, našem olimpijcu i najboljem taekwondoisti Nedžadu Husiću uručena je novčana nagrada.

Nagradu su tokom održavanja Tehničkog kursa za trenere 2022 uručili predsjednik OK BiH prof.dr Milanko Mučibabić i potpredsjednik OK BiH akademik prof.dr Izet Rađo, a povodom osvajanja srebrne medalje na Evropskom prvenstvu za seniore u Mančesteru 2022.godine.



U pratnji Nedžada su bili njegov trener Haris Husić i predsjednik Taekwondo saveza BiH Samir Šarić.

Čestitamo Nedžadu i njegovom timu, te se radujemo budućim uspjesima.

## UČEŠĆE PREDSTAVNIKA OLIMPIJSKOG KOMITETA BIH NA ANOK GENERALNOJ SKUPŠTINI SEUL 2022, JUŽNA KOREJA

Generalna skupština Asocijacije nacionalnih olimpijskih komiteta održana je u Seulu 19.10. i 20.10.2022, uz dodatak posebnih sesija 21.10.2022. Skupštinu je otvorio predsjednik MOK-a dr. Thomas Bach te se obratio učesnicima. Tokom obraćanja Predsjednik Bach je napravio osvrt na trenutnu, globalnu situaciju i izazove sa kojima se suočava Olimpijski pokret u datom kontekstu, naglasivši da svi sudionici olimpijskog pokreta trebaju ostati ujedinjeni na olimpijskom putu.



Skupština je održana u hibridnom formatu, a predstavnici OK BiH prof. dr Milanko Mučibabić predsjednik OK BiH i dr. sci Said Fazlagić generalni sekretar OK BiH su učestvovali putem online platforme u prostorijama OK BiH. Više o Generalnoj skupštini ANOK-a pročitajte [OVDJE](#).

## SVEČANI PRIJEM POVODOM ZAVRŠETKA MANDATA AMBASADORA JAPANA U BOSNI I HERCEGOVINI



Ambasada Japana u Bosni i Hercegovini upriličila je oproštajni prijem povodom završetka mandata N.J.E. ITO Makoto, Ambasadora Japana u Bosni i Hercegovini. Svečanom prijemu prisustvovali su predstavnici Olimpijskog komiteta Bosne i Hercegovine, predsjednik prof. dr Milanko Mučibabić, potpredsjednik gosp. Marijan Kvesić i generalni sekretar dr sci. Said Fazlagić. Predstavnici OK BiH su ovom prilikom uručili prigodan poklon uz zahvalnost Ambasadoru za saradnju tokom proteklog mandata, a posebno Ljetnih olimpijskih igara Tokyo 2020.

## EVROPSKI OLIMPIJSKI KOMITETI (EOC) SU USVOJILI STRATEŠKU AGENDU 2030 I ETIČKI KODEKS EVROPSKE OLIMPIJSKE PORODICE



Olimpijski komiteti (NOK) Evrope odobrili su Stratešku agendu Evropskog olimpijskog komiteta (EOK) 2030 i implementaciju Etičkog kodeksa, 10. decembra 2022. godine, potvrđujući svoju posvećenost Olimpijskoj povelji i njenim osnovnim principima.

Predsjednik Evropskih olimpijskih komiteta Spyros Capralos naglasio je značaj Strateške agende EOK-a 2030 i vjeruje da će oni igrati ključnu ulogu u izgradnji svjetlije budućnosti za evropsku olimpijsku porodicu.

Više pročitajte na [ovom linku](#).



## HUMANITARNI RAD | OLIMPIJSKI KOMITET BIH OBRADOVAO NAJMLAĐE I PODIJELIO NOVOGODIŠNJE PAKETIĆE U LIVNU, TREBINJU I SARAJEVU



Olimpijski komitet BiH kao društveno odgovorna organizacija u sklopu svoje novogodišnje humanitarne akcije, najčešće obrađuje naše mališane sa novogodišnjim paketićima.

Prva dodjela paketića je upriličena sa šticienicima Centra za socijalnu pomoć Livno u Domu kulture Livno. Ovom prilikom su doc.dr. Said Fazlagić, generalni sekretar OK BiH i domaćin August Orlović, potpredsjednik Suda časti i sportske arbitraže OK BiH uručili 40 paketića, na radost i sreću najmlađih.

Zahvaljujemo se ljubaznom osoblju i šticienicima Centra za socijalnu pomoć Livno, na srdačnom dočeku i ugodnom druženju.

Nakon Livna, Olimpijski komitet BiH je obradovao mališane novogodišnjim paketićima i u Trebinju.

U Kulturnom centru Trebinje generalni sekretar OK BiH doc. dr. Said Fazlagić i g-din Momčilo Bodiroga, član Skupštine OK BiH podijelili su 40 paketića mališanima, te im predstojeće novogodišnje praznike učinili ljepšim i veselijim. Olimpijski komitet BiH se zahvaljuje domaćinima, a posebno mališanima koji su uzvratili najljepšim poklonima, svojom iskrenom srećom i osmijesima.



Završna humanitarna aktivnosti Olimpijskog komiteta BiH je održana u prostorijama Olimpijskog muzeja. OK BiH je sa 40 novogodišnjih paketića obradovao i mališane u Sarajevu. U veselom ambijentu i druženju sa sarajevskim mališanima, završena je akcija podjele novogodišnjih paketića Olimpijskog komiteta BiH.

Nadamo se da smo bar na trenutak učinili ljepše i veselije novogodišnje praznike mališanima širom Bosne i Hercegovine.



# SPORTSKI STRUKOVNI SAVEZI BIH

## DŽUDO SAVEZ BOSNE I HERCEGOVINE PRIZNANJE EVROPSKE DŽUDO UNIJE

Evropska džudo unija (EJU) je prepoznala dugogodišnji rad Džudo saveza Bosne i Hercegovine, organizacijom sedam Evropskih prvenstava, dva Svjetska prvenstva i preko trideset Evropskih kupova, te ih je nagradila priznanjem za najbolju organizaciju Evropskih prvenstava za 2022. godinu.



Nagradu je uručio Predsjednik EJU dr. Laszlo Toth, predsjedniku Džudo saveza BiH i članu IK OK BiH prof. dr Branislavu Crnogorcu i njegovom timu, kao i Ministru kulture i sporta Kantona Sarajevo Samiru Avdiću na kontinuiranoj podršci džudo sportu u Bosni i Hercegovini. Čestitamo!

## MEĐUNARODNI DŽUDO TURNIR “BIH I NIPPON”

Tradicionalni 22. međunarodni džudo turnir “BiH I NIPPON” održan je tokom trećeg vikenda u oktobru, u sportskoj dvorani “Goran Čengić” u Sarajevu.

Ovaj turnir, koji slavi prijateljstvo Japana i Bosne i Hercegovine, organizuje Džudo savez Bosne i Hercegovine u saradnji i pod pokroviteljstvom Japanske ambasade u Bosni i Hercegovini i Vlade Japana.

Turnir su svojim prisustvom uveličali Njegova Ekselencija ambasador Japana u BiH Ito Makoto i ministar kulture i sporta KS, gospodin Samir Avdić.

Na turniru je učestvovalo oko 250 mladih džudista koji su pokazali zavidan nivo znanja džudo tehnike i pripreme.

Bio je ovo još jedan džudo praznik u Sarajevu.





## **ATLETSKI SAVEZ BOSNE I HERCEGOVINE PRESTIŽNO PRIZNANJE KADA DELIĆ SELIMOVIĆ, DOBITNICA EVROPSKE TRENERESKE ATLETSKE NAGRADE**

Kada Delić-Selimović, direktorica Atletskog kluba “Sloboda Tehnograd” iz Tuzle je u Talinu na Kongresu Evropske atletike, dobila priznanje koje se dodjeljuje najuspješnijim atletskim trenerima Evrope. Osim tuzlanske trenerice, nagradu je dobio i Heiko Vaat iz Estonije.



“Godine borbe, uspjeha, padova, uspona, sportskih i trenerskih rezultata krunisani su dodjelom priznanja za mene i Atletski savez BiH na svečanosti ‘European athletics golden track’. Priznanje za najuspješnije trenere je još veće priznanje kad znam da ove godine AK “Sloboda Tehnograd” proslavlja veliki jubilej 75 godina postojanja. Ponosna na sve do sada ostvareno. San je postao realnost“.

Kada Delić je rođena u Tuzli 10. jula 1965. godine. Iako se bavila kros trčanjem, ubrzo se prebacila na disciplinu brzo hodanje gdje je ostvarila velike uspjehe. Kao reprezentativka bivše države Jugoslavije, u disciplini brzo hodanje postigla je brojne sportske uspjehe i postavila rekorde koji do danas nisu oboreni.

Delić je bila prva atletičarka koja je predstavljala Bosnu i Hercegovinu na Svjetskom prvenstvu 1993. u Stuttgartu kao i nastupima na Olimpijskim igrama 1992. u Barceloni i 1996. godine u Atlanti, Evropskom prvenstvu u Helsinkiju 1994. godine, itd.



Od 1997. godine posvetila se trenerskoj profesiji, a na Olimpijskim igrama u Sidneju 2000. i Atini 2004. sudjelovala je kao trener ženske atletske reprezentacije Bosne i Hercegovine. Ova uspješna sportistkinja obnaša funkciju direktorice Specijalne Olimpijade BiH sa čijim članovima postiže zapažene rezultate. Osim toga, trenerica je u Atletskom klubu “Sloboda Tehnograd” Tuzla.

Kompletnu vijest pročitajte [OVDJE](#).

## TENISKI SAVEZ BOSNE I HERCEGOVINE ODRŽANA KONFERENCIJA TENISKIH TRENERA BiH

U organizaciji Teniskog saveza BiH, 10. i 11. novembra 2022. u Sarajevu, održana je Konferencija teniskih trenera Bosne i Hercegovine.




Na Konferenciji teniskih trenera BiH učestvovalo je preko pedeset trenera iz cijele Bosne i Hercegovine. Iz Teniskog saveza Bosne i Hercegovine iskazali su zadovoljstvo odzivom broja teniskih trenera koji su učestvovali na konferenciji, te njihovim aktivnim učešćem na panel diskusiji na temu: "Na koji način unaprijediti teniska takmičenja za najmlađe kategorije u Bosni i Hercegovini?"

Također se razgovaralo o trenerskoj sekciji i njenom aktivnijem učešću u razvoju tenisa u BiH. Teme o kojima se razgovaralo će sigurno utjecati na razvoj, promociju i omasovljavanje teniskog sporta u našoj državi.

## TRIATLON I PENTATLON SAVEZ BOSNE I HERCEGOVINE ZVANIČNI PRIJEM U WORLD TRIATHLON

Na kongresu World Triathlon-a održanom 27.11.2022.g. u Abu Dhabiju, Triatlon i pentatlon savez Bosne i Hercegovine je primljen u punopravno članstvo.

Nakon što je TPSBiH, uz podršku Olimpijskog komiteta Bosne i Hercegovine, uputio zahtjev za članstvo u World Triathlon, svi punopravni članovi su mogli glasati na 35. WT kongresu. Velikom većinom glasova svi predloženi novi članovi su prihvaćeni u punopravno članstvo.



Članstvom u World Triathlon-u otvaraju se nove prilike sa razvoj triatlona u Bosni i Hercegovini. Ponajviše se mogu radovati triatlonski takmičari, reprezentativci Bosne i Hercegovine, kojima se otvara put za nastup na evropskim i svjetskim takmičenjima.

Čestitke TPS BiH iz Olimpijskog komiteta Bosne i Hercegovine!



## **BOKSERSKI SAVEZ BOSNE I HERCEGOVINE ODRŽANA GENERALNA SKUPŠTINA SAVEZA**



Bokserski savez Bosne i Hercegovine je u decembru mjesecu održao vanrednu sjednicu Generalne skupštine Saveza u multimedijalnoj sali Olimpijskog komiteta Bosne i Hercegovine.

## **CHEERLEADING SAVEZ BOSNE I HERCEGOVINE CHEERLEADING REPREZENTACIJA BIH OSVOJILA SVOJU PRVU MEDALJU**



Seniorke Hrvatskog cheerleading kluba Široki predstavljale su Bosnu i Hercegovinu u dvije discipline na Međunarodnom turniru u Dubrovniku na kojem je sudjelovalo 15 država i preko 1500 sportaša.

Valentina Kraljević i Natalija Galić osvojile su zlato u duo disciplini te su se plasirale u top 30 najboljih nastupa. U solo disciplini Bosnu i Hercegovinu predstavljala je Nikolina Čolak. I pored tehničkih smetnji sa muzikom, minutu i 6 sekundi izvela je uz podršku mnogobrojne publike u Dubrovniku koji su je vodili pljeskom do kraja, a suci su je bodovali prema izvedenom i osvojila je zlatnu medalju.

### **Preko 100 cheerleadersica nastupilo u Ljubuškom**



U Kulturnom centru u Ljubuškom održan je Christmas Cheerleading Challenge. Na događaju je sudjelovalo preko 100 cheerleadersica iz pet klubova: Širokog Brijega, Ledinca, Gacka, Nevesinja i Ljubuškog. Ovaj događaj privukao je veliki broj gledatelja. Ostvarene rezultate možete pročitati [OVDJE](#).

### **U Širokom Brijegu održan 6. Cheerleading kamp**

U Širokom Brijegu održan je 6. Cheerleading kamp. Na kampu je kroz dva dana sudjelovalo 110 sportaša i trenera iz Širokog Brijega, Ledinca, Mostara, Ljubuškog, Čitluka, Gruda, Nevesinja, Čapljine, Zenice, Umaga i Splita. Cheerleading kamp u Širokom Brijegu jedini je vidobuka za cheerleading sportaše zbog čega i privlači velik broj sportaša i trenera svake godine. Više o kampu i aktivnostima pročitajte [OVDJE](#).





## SAVEZ SPECIJALNE OLIMPIJADE BOSNE I HERCEGOVINE

### Posjeta i Monitoring programa “Inkluzija kroz sport za djecu sa poteškoćama u razvoju”



Specijalna olimpijada BiH je u periodu od 22-26. novembra u Tuzli bila domaćin predstavnicima Fonda norveških grantova za regionalnu saradnju, koji su u proteklih godinu i po finansirali regionalni projekat “Inkluzija kroz sport za djecu sa poteškoćama u razvoju”. U okviru realizacije projekta: “Inkluzija kroz sportske aktivnosti za djecu sa poteškoćama u razvoju” koji se sprovodi u Rumuniji, Slovačkoj, Litvaniji, Islandu, Crnoj Gori, Poljskoj i Bosni i Hercegovini, u Tuzli su boravili predstavnici SO Islanda: Anna Karolina Vilhjalmsdottir, Asta Katrin Helgadottir, Karl Jonsson i Jon Bjorn Olafsson.

Cilj posjete je bio da se donator i partner projekta upozna sa aktivnostima sprovođenja trogodišnjeg projekta u Bosni i Hercegovini i implementacije programa “Razvojne sportske aktivnosti”.

Projekat “Inkluzija kroz sportske aktivnosti za djecu sa poteškoćama u razvoju” je prvi projekat koji se realizuje u Bosni i Hercegovini uz podršku Norveškog granta i ima za cilj unaprijediti tradicionalne modele dječjeg razvoja, razvijajući motoričke i socijalne vještine, smanjujući i rizik od marginalizacije, podršku inkluzije. Na ovom polju Specijalna olimpijada BiH je uradila mnogo i učinila da se djeca sa poteškoćama u razvoju u svakom trenutku uključuju u iste aktivnosti kao i djeca bez poteškoća. Značaj bavljenja sportom još od najranije dječije dobi za ovu je djecu od posebne važnosti. Sport im omogućava pravilan rast i razvoj, ali i socijalno uključivanje, putem grupnog rada. Anna Karolina Vilhjalmsdottir sa svojim saradnicima se najiskrenije zahvalila rekavši da je impresionirana načinom rada u Bosni i Hercegovini i podrškom koju Specijalna olimpijada BiH ima i koja radi na poboljšanju inkluzivnih procesa i izmjena zakonskih regulativa u korist osoba sa poteškoćama u razvoju. Više o projektu, aktivnostima i monitoringu pogledajte u [VIDEU](#) kao i na ovom [LINKU](#).





## BH • TEAM

### DŽUDO | SVJETSKO PRVENSTVO TASHKENT REZULTATI BH. DŽUDOKA



Džudo reprezentativci Bosne i Hercegovine nastupili su na Svjetskom džudo prvenstvu Tashkent 2022 koje je održano od 06 - 12. oktobra u Uzbekistanu. Naše reprezentativke, olimpijka Larisa Cerić (+78 kg) i Aleksandra Samardžić (-70 kg) su se plasirale među 16 najboljih svjetskih džudistkinja.

Larisa Cerić i Aleksandra Samardžić plasmanom među 16 najboljih na Svijetu, osvojile su po 320 bodova za olimpijsku normu, odnosno olimpijsku i svjetsku ranking listu. Anđela Samardžić je na Svjetskom prvenstvu u Tashkentu temeljem pobjede nad predstavnicom Kazahstana osvojila 240 bodova. Čestitamo našim džudašicama!

### MUSTAFA HEBIB NASTAVLJA SJAJNE REZULTATE

Bosanskohercegovački džudista Mustafa Hebib osvojio je zlatnu medalju na Evropskom kupu CLUJ-NAPOCA u Rumuniji za juniore u kategoriji do 81kg.

Mjesec dana poslije, osvojio je još jednu medalju, ovaj put bronzanu na Asia Judo Open - Lebanon 2022, što je još jedan veliki uspjeh mladog bosanskohercegovačkog judo reprezentativca Mustafe Hebiba. Osvajanjem bronzane medalje na Asia Open Mustafa je osvojio nove bodove za predstojeće Olimpijske igre Paris 2024! Čestitamo!





## TAEKWONDO | NEDŽAD HUSIĆ

Najbolje plasirani olimpijac (OI Tokyo 2020) Nedžad Husić ostvario je zapažene rezultate u proteklom periodu.

Nedžad Husić je bio jedini bh. predstavnik na Svjetskom taekwondo prvenstvu za seniore Guadalajara 2022, na kojem se plasirao među osam najboljih boraca svijeta (5. mjesto). Husić je nastupio u kategoriji do 74 kilograma u drugom kolu, obzirom da je kao šesti nositelj bio slobodan u prvom, te ostvario pobjede protiv predstavnika Haitija i Švedske. U četvrtfinalu susreo se sa predstavnikom Španije koji je ovaj put bio bolji u duelu, ali svakako da je ovaj rezultat vrijedan hvale.



Ranije, u nastupu na World Taekwondo Grand Prix MANCHESTER 2022, Nedžad je zabilježio dvije pobjede i jedan poraz te je osvojio dodatne bodove za Svjetsku i Olimpijsku listu.

## EVROPSKO TAEKWONDO PRVENSTVO ZA KADETE 2022 MALTA

Mladi bh. taekwondo sportisti su zabilježili sjajne uspjehe na Evropskom prvenstvu za kadete. Nino Šeremet je u kategoriji +65kg ostvario pobjede nad predstavnicima Grčke (tri protivnika) i Švedske te ostvario veliki uspjeh za bh. taekwondo, osvojivši zlatnu medalju!

Sara Džafić je ostvarila pobjede nad predstavnicama Crne Gore, Moldavije i Belgije i time osvojila bronzanu medalju na Evropskom taekwondo prvenstvu za kadete. Čestitamo takmičarima, trenerima i Taekwondo savezu Bosne i Hercegovine.





## TAEKWONDO | G2 turnir "Galeb Belgrade Trophy - Serbia Open 2022"



Bosanskohercegovački sportisti su učestvovali u Beogradu na G2 taekwondo turniru "Galeb Belgrade Trophy - Serbia Open 2022", na kojem su ostvarili veoma zapažene rezultate. U konkurenciji seniora, srebro je osvojio Nedžad Husić, dok su bronzu osvojili Katarina Krašnik i Erol Nući. U konkurenciji juniora zlato su osvojili Marija Jokić, Jelena Vasić i Abdulah Bejtić, dok su bronzu osvojili Marija Orlović i Džejna Hamzić. U

konkurenciji kadeta zlatom su se okitili Nino Šeremet i Hena Melez, srebrom Ejla Makaš, Milica Vasić, Emin Demić, te bronzom Adela Fafulović, Lamija Alihodžić, Laura Kujačić i Jurčević Tin. Također, u seniorskoj konkurenciji nastupala je i Ada Avdagić. Nakon pobjede u prvom kolu protiv predstavnice Srbije od 2:1, u drugom kolu u borbi za medalju, Ada Avdagić je poražena u samom finišu od dvostruke olimpijske osvajačice medalja rezultatom 2:1 čime je pokazala da njeni uspješni seniorski dani tek dolaze.

## G2 "BOSNIA AND HERZEGOVINA OPEN 2022 & G2 TURNIR MONTENEGRO PODGORICA OPEN 2022"



Ada Avdagić, stipendista OK BiH, osvojila je svoju prvu medalju, bronzanu, u seniorskoj konkurenciji -53 kg na G2 olimpijskom bodovnom taekwondo turniru Podgorica Open 2022 i tako upisala prve bodove na svjetskoj seniorskoj taekwondo ranking listi.

U nastavku takmičenja, Ada je u seniorskoj konkurenciji do 53 kg na G2 olimpijskom bodovnom taekwondo turniru održanom u Sarajevu osvojila bronzanu medalju. Ovo je bila njena druga seniorska medalja i novi bodovi na svjetskoj seniorskoj WT rang listi.

Naravno moramo spomenuti i čestitati ostalim BiH predstavnicima koji su na G2 "Bosnia and Herzegovina Open 2022 osvojili medalje, a to su:

**ZLATO:** Petra Ždero

**BRONZA:** Jusuf-Ali Rašidagić, Erol Nući, Džejla Makaš, Zorana Sandić i Nadina Mehmedović.



## TAEKWONDO | BOSNA I HERCEGOVINA EKIPNO PRVOPLASIRANA NA BALKANSKOM TAEKWONDO PRVENSTVU

Na Balkanskom prvenstvu koje se održalo u Albaniji učestvovalo je 120 takmičara iz Bosne i Hercegovine, a naši predstavnici su osvojili prvo mjesto u ekipnom poretku.

Ovo je sjajan rezultat i pokazatelj da je naša zemlja zaslužno dobila domaćinstvo za organizaciju ovog takmičenja u narednoj godini. Drugoplasirana je bila ekipa Turske, dok je treće mjesto bila domaćin Albanija.

“Pokazali smo da osim organizacionih uspjeha, naši sportisti ostvaruju vrhunske rezultate i stavljaju Bosnu i Hercegovinu na mapu uspješnih taekwondo nacija.



Osvojili smo dvadeset zlatnih medalja i zaslužno se našli na postolju u ekipnom poretku,” istakao je Samir Šarić, predsjednik Taekwondo saveza BiH.

Čestitamo našim sportistima, trenerima i Taekwondo savezu Bosne i Hercegovine na svim rezultatima postignutim u proteklom periodu!





## PLIVANJE | 16. FINA SVJETSKO PRVENSTVO



BiH reprezentativci u plivanju su nastupili na 16. FINA Svjetskom prvenstvu u plivanju u malim bazenima (25 m) u Melburnu (Australija). Olimpijka Lana Puda je s vremenom 2:05.23 završila finalnu utrku u disciplini 200m delfin na svjetskom prvenstvu u malim bazenima (Melbourne) i zauzela odlično peto mjesto, dok na 100m delfin ostvarila 10. poziciju.

Iman Avdić je nastupila u disciplini 400m mješovito zauzela 17. mjesto, na 800m kraul osvojila je 18. poziciju, dok je na 200 i 400 m kraul nastupila u kvalifikacijama.

Treći predstavnik BiH na ovom Prvenstvu je bio Adi Mešetović koji je u disciplinama 50m i 100m kraul zauzeo 46. pozicije. Čestitamo!

## 2022 FINA SWIMMING WORLD CUP BERLIN



Najbolja bh. plivačica Lana Pudar je na Svjetskom kupu u utrci na 200 metara delfin zauzela 5. mjesto u ukupnom poretku sa isplivanim vremenom 2:06.25. U disciplini 100m delfin Lana je s vremenom 58.84 zauzela 13. mjesto u ukupnom poretku.

Osvajačica medalje sa ljetnog EYOF-a 2022, plivačica Iman Avdić je takođe je nastupila u disciplini 400 metara kraul i ostvarila plasman na 18. mjesto, dok je u disciplini 800m kraul zauzela 19. poziciju.

Na Svjetskom kupu u Berlinu učestvovali su i Jovan Lekić, Adi Mešetović, Nikola Bjelajac i David Vučić, koji su ostvarili dole navedene rezultate:

Adi Mešetović, 50m kraul - 34. mjesto i 100m kraul 43. mjesto  
Nikola Bjelajac, 50m kraul - 48. mjesto i 100m kraul 55. mjesto

Jovan Lekić, 400m kraul - 22. mjesto, dok je 200m delfin ostvario 29. mjesto.  
David Vučić, 200m mješovito, 33. mjesto

Čestitamo.



## BICIKLIZAM | LEJLA NJEMČEVIĆ OSVOJILA SVJETSKU MARATON LIGU U BICIKLIZMU

Iza Lejle Njemčević je sjajna takmičarska sezona! Najbolja bosanskohercegovačka biciklistkinja ostvarila je uspjeh karijere nakon što je osvojila Svjetsku maraton ligu.

Liga je sastavljena od sedam utrka Svjetskog kupa, a Lejla je zauzela prvo mjesto sa 1.200 bodova, odnosno 220 bodova više od drugoplasirane Njemice Stefanie Dohrn, dok je na trećem mjestu sa 660 bodova završila Janina Wust iz Švicarske.



Lejla je tokom sezone bila najkonstantnija takmičarka i na pet od sedam svjetskih kupova završila je na postolju.

“U ovoj sezoni smo postavili dva velika cilja, osvajanje Svjetske maraton lige i prvog mjesta na UCI maraton ranking listi. Zaista smo sretni da sam osvojila ligu, to je bilo izuzetno iscrpljujuće jer morate konstantno kroz sezonu koja je trajala od februara do oktobra ostvarivati vrhunske rezultate”, rekla je Lejla Njemčević.

Bravo Lejla!

## ALPSKO SKIJANJE | ELVEDINA MUZAFERIJA



Najbolja bosanskohercegovačka skijašica otpočela je svoje nastupe. U utrci spusta u švicarskom St. Moritzu. Elvedina Muzaferija je zauzela 37. mjesto. Muzaferija je kroz cilj prošla u vremenu 1:31.28, što je od pobjednice bilo sporije dvije sekunde i 43 stotinke.

Podsjetimo, na prva dva spusta u kanadskom Lake Louiseu Muzaferija je zauzela 33. i 36. mjesto.



## BRZO KLIZANJE

### ALPE ADRIA TROPHY | ERMIN RAŠČIĆ I NEDIM MUZAFEROVIĆ



Juniorski reprezentativci Bosne i Hercegovine u brzom klizanju (short track), Ermin Raščić i Nedim Muzaferović, nastupili su na međunarodnom takmičenju "Alpe Adria Trophy", koje je održano 12. i 13. novembra u Zagrebu (Hrvatska).

U konkurenciji 200 takmičara iz 11 zemalja, naši reprezentativci imali su dobar nastup. Ermin Raščić je u kategoriji Juniori A osvojio srebrnu medalju, a Nedim Muzaferović kao Junior B je osvojio bronzanu medalju. Nedimu je ovo bio prvi nastup za reprezentaciju BiH.

U nastavku klizačke sezone naše sportiste očekuju novi izazovi, a mi im želimo mnogo sreće u budućim nastupima!

## DIZANJE TEGOVA | VELIKI USPJEH BH OLIMPIJSKOG DIZANJA TEGOVA

U albanskom gradu Durresa od 15.10. do 25.10.2022., održano je Evropsko prvenstvo u konkurenciji U20 /U23 za žene.

Naša reprezentativka Amina Mašić pod vodstvo trenera Nedima Mašića ostvarila je 3 četvrta mjesta i to u disciplinama trzaj, izbačaj i biatlon.

Amina Mašić se borila u kategoriji do 87kg i kako je saopšteno iz saveza dizača tegova BiH, Amina je oborila i tri državna rekorda u trzaju.



Čestitamo Amini, njenom treneru i savezu dizača tegova BiH.

## KARATE

### 4 MEDALJE NA SVJETSKOM PRVENSTVU ZA KADETE, JUNIORE I U21



Karate reprezentacija Bosne i Hercegovine nastupila je na 12. Svjetskom prvenstvu za kadete, juniore i U21 koje je održano u Konya (Turska) u periodu od 26 -30.10.2022.godine.

Bosnu i Hercegovinu je predstavljalo 33 takmičara a ostvareni su slijedeći rezultati:

Srebrna medalja - Pavle Dujaković, borbe U21 -60 kg  
Bronzana medalja - Emina Sipović, borbe juniorke -59 kg  
Bronzana medalja - Anes Bostandžić, borbe U21 + 84 kg  
Bronzana medalja - Luka Pejić, borbe juniori -63 kg

Ostale zapažene rezultate i više o učešću na takmičenju pročitajte na linku [OVDJE](#).

### 2022 KARATE 1 SERIES A JAKARTA (INDONESIA)

Mladi bosanskohercegovački karatisti Hamza Turulja i Rijad Džuho osvojili su zlatne medalje na prestižnom turniru Karate 1 Serije A u Jakarti.

Na putu do finala u kategoriji +84 kg Rijad Džuho je pobijedio predstavnike Kazahstana, Indonezije, Ukrajine i Indije, a u najvažnijem duelu snage je odmjerio sa Japancem Fumiya Yoshimurom. Iako je Japanac u borbu ušao kao favorit, Rijad je uspio doći do pobjede.



U kategoriji -75 kg Hamza Turulja je do finala bio bolji od Sunil Reddy Gokula (Indija), Enesa Buluta (Turska), Shunji Suzukija (Japan), Hsu Wei-Chuna (Kineski Taipei) i Oleksandra Karasa (Ukrajina). U finalnoj borbi Hamza je savladao Mohameda Abudabousa, predstavnika Libije.

Čestitamo našim karatistima na ovim sjajnim rezultatima!

### FISU UNIVERZITETSKI SVJETSKI KUP

U Turskom Samsunu održao se FISU Univerzitetski svjetski kup u 6 boričkim sportovima na kojem je učestvovalo preko 430 univerziteta iz 50 zemalja svijeta. Naši karatisti su predstavljali Univerzitete u Sarajevu, Tuzli i Banja Luci te osvojili 3 odličja. Predstavnici Univerziteta u Sarajevu/Fakultet za sport i tjelesni odgoj osvojili su dvije medalje. Hamza Turulja je osvojio srebrnu medalju u kategoriji do 84kg, a Rijad Džuho bronzanu medalju u kategoriji preko 84kg.

Predstavnica Univerziteta u Tuzli/Fakultet za tjelesni odgoj i sport Stefani Krešić osvojila je srebrnu medalju u kategoriji preko 68 kg.





## KIK-BOKS | SVJETSKO PRVENSTVO U KIK-BOKSU ZA KADETE I JUNIORE



Kik-boks reprezentacija Bosne i Hercegovine, učestvovala je na Svjetskom kadetskom i juniorskom prvenstvu u Italiji koje je okupilo 2500 takmičara iz 64 države.

Zlato i titulu svjetskog prvaka osvojili su Jana Đerić, Viktor Milić i Tutić Amil. Srebro su osvojili takmičari Neven Stojanović, Slaviša Nikolić, Muminović Kanita, Sejmenović Leyla, Hebibović Nuh.

Bronzanim medaljama okitili su se Krupić Mehmed, Radulović Lazar, Zorić Simo, Hasi Šefik, Skalić Jasko, Alajbegović Ervin, Memija Benjamin, Vujanović Marija i Velagić Nurdžihan.

## EVROPSKO SENIORSKO KIK-BOKS PRVENSTVO ANTALYA 2022

Naša reprezentacija je ovo Evropsko prvenstvo završila sa osvojenom jednom srebrnom i tri bronzane medalje.

Najbolji rezultat je ostvarila Jasmina Merdić, koja je u finalnoj borbi za titulu evropske prvakinje u disciplini low kick +70 kg poražena od Hrvatice Nives Radić.

U polufinalnim borbama su zaustavljeni Edin Vučelj (kick light – 89 kg) od koga je bio bolji Španac Juan Machin De Quintana i Nikola Drobniak (low kick – 81 kg) koji je izgubio od Hrvata Gaja Ćosića. Njima su pripale bronzane medalje, a bronzanu medalju je osvojio i Mesud Selimović (low kick -91 kg).

U sastavu reprezentacije Bosne i Hercegovine bilo je 18 takmičara, 13 u muškoj i pet u ženskoj konkurenciji. U ženskoj konkurenciji pored Jasmine Merdić koja je osvojila medalju nastupile su još Edina Halilović, Doris Živković (low kick), Adna Hodžić i Ivana Radić (kick light).

Muški dio reprezentacije pored trojice osvajača medalja Mesuda Selimovića, Nikole Drobnjaka i Edina Vučenja činili su još: Rijad Kasapović, Wael Mejri, Jasmin Ramić, Amar Lugan, Harun Sinanović, Vedad Ćutuk (low kick), Sanjin Alihodžić, Albert Ugrinčić (K1), Faris Svraka i Miloš Golić (kick light).



Trenerski dio ekipe predvodio je selektor Salko Zildžić, te treneri: Adnan Redžović, Senad Ćatić, Asmar Imamović, Dimitrije Jovanović, Šemso Šabanović, Elvedin Dubravac, Vedad Mulaomerović i Ermin Lugan. Na prvenstvu su učestvovali i sudije iz Bosne i Hercegovine Neđo Bratić i Dragana Vitković. Čestitamo!



## EU PROJEKTI

### RINGS INOVATIVNI NAČIN UPRAVLJANJA NOK-ova I SPORTSKIH ORGANIZACIJA | ZAVRŠNA KONFERENCIJA



Kancelarija EOK EU je 7. decembra organizovala završnu konferenciju projekta RINGS, sufinansiranog od strane Erasmus+ Sport programa Evropske unije, u Briselu. Završnoj konferenciji prisustvovao je generalni sekretar Olimpijskog komiteta Bosne i Hercegovine dr.sci. Said Fazlagić.

Nakon završenog sastanka između 13 partnera u konzorcijumu, uključujući 11 NOK-ova, završna konferencija je bila prilika da se ukratko istakne relevantnost projekta i prikažu postignuti rezultati.

Cilj projekta je razvoj strateškog upravljanja modernih NOK-ova u Evropi, uključujući rad sa različitim interesnim stranama. Razvijeni alati opremaju i podržavaju NOK-ove u njihovom svakodnevnom operativnom upravljanju kako bi očuvali svoju ulogu krovnih sportskih organizacija i kao ključnog dijela civilnog društva.

**REZULTATI PROJEKTA:** U toku završne konferencije prezentirani su završni rezultati koji su sublimirani kroz: Priručnik o strateškom menadžmentu, Vodič za odnose s javnošću i Alati za interesne strane. Više o projektu možete pročitati na linku [OVDJE](#).

### ODRŽAN ŠESTI TRANSNACIONALNI SASTANAK PARTNERA MLEA

Olimpijski komitet Bosne i Hercegovine, partner na projektu MLEA - Micro Learning Entrepreneurship for Athletes koji se sufinansira sredstvima Evropske unije u okviru programa Erasmus+, prisustvovao je šestom partnerskom sastanku koji se održao 28.10.2022. godine u prostorijama Olimpijskog komiteta Srbije.

Sastanku su također prisustvovali predstavnici poslovnih škola iz Njemačke, Švedske i Hrvatske, Evropske univerzitetske sportske asocijacije kao i Olimpijskog komiteta Srbije, Hrvatske i Slovenije.


Na sastanku se razgovaralo o završenim aktivnostima projekta, te je naglašeno da se aktivno radi na uspostavljanju online edukacije koja će biti posebno kreirana za aktivne i bivše sportiste na temu mikro učenja u poduzetništvu te sticanju neophodnih znanja i vještina kako bi se olakšao prelazak iz sportske u preduzetničku karijeru.

Do marta 2023. godine očekuje se uspješna realizacija MLEA projekta, a svi zainteresovani mogu pratiti aktivnosti i pozive za učešće na projektu putem društvenih mreža OK BiH.





## INTERVJU SA... **LANOM PUDAR**



**OK BiH:** *Olimpijski komitet Bosne i Hercegovine te proglasio sportistom 2022.godine. Šta tebi znači ovo priznanje?*

**LANA PUDAR:** Znači mi puno u svakom slučaju. Olimpijski komitet Bosne i Hercegovine je institucija koja odlično zna i razumije sve što bh. sportisti rade i postižu tokom godine i kao takva sigurno je najrelevantnija dati svoj sud o našim postignućima. Drago mi

je što su prepoznali sve što sam napravila u ovoj godini i svakako da ću i u narednom periodu nastaviti još jače raditi i truditi se da postignem još bolje rezultate.

**OK BiH:** *Vjerovatno si svjesna da si uzor mnogim klincima u Bosni i Hercegovini i da je plivanje postalo jedno od najpopularnijih sportova u našoj državi, a sve zahvaljujući tvojim ostvarenjima. Kako se nosiš sa tom popularnošću?*

**LP:** Zna ponekad biti i malo naporno, ali opet ne bih bila iskrena da ne kažem da mi to i ne godi. Lijepo je kada te u svojoj sredini ljudi cijene i kada poštuju to što sam napravila. Da sve to ne bi otišlo u nekom pogrešnom smjeru što se tiče mojih javnih nastupa i svega što ti nastupi nose, o tome se brine moj tim ljudi na čelu sa prof. Damirom Đedovićem. Tako da nemam neki poseban teret mojih rezultata, odnosno popularnosti koju ti rezultati neminovno nose sa sobom.







Foto izvor: [AlJazeera](#)

na Svjetskom prvenstvu u Japanu koje će se održati krajem sedmog mjeseca. To takmičenje će biti i jedna mala proba za Pariz, jer će na tom prvenstvu nastupiti sve najbolje svjetske plivačice u ovom trenutku.

**OK BiH:** *Pariz je blizu, kakav je plan priprema tebe i tvog tima?*

**LP:** Pa svakako da je plan pripremiti se što bolje za taj nastup jer su olimpijske igre za mene najbitnije takmičenje. Bit će puno putovanja na pripreme širom svijeta, puno jakih sparinga na treninzima i puno teškog rada. Ukratko, znam da me čeka jedan vrlo naporan i intenzivan period koji neće biti nimalo lagan. Ali tako je kako je, znam šta me čeka i na to sam spremna.

**OK BiH:** *Kakvi su ti planovi za Novogodišnju noć i imaš li neku posebnu želju koju ćeš poželiti?*

**LP:** Što se tiče dočeka Nove godine, planiram ga provesti sa svojim prijateljicama u svom gradu. Moje novogodišnje želje su vezane prije svega za dobro zdravlje mene, moje porodice i mojih najbližih, a sve ostalo će doći. Ovim putem želim da poželim sretnu i uspješnu Novu godinu svim Bosancima i Hercegovcima širom domovine i dijaspore, kao i svim ljudima dobre volje.







**OK BiH:** *Kako si zadovoljna svojim rezultatima u 2022. godini i kakva su ti očekivanja od predolimpijske 2023. godine?*

**LP:** Prezadovoljna sam svojim rezultatima u 2022. godini. Ono što smo planirali, to smo i postigli. U 2023. godini cilj je ostvariti A olimpijske norme u mojim najjačim disciplinama i pripremiti se dobro za nastup

*Našoj mladoj olimpijki želimo dobro zdravlje i mnogo sportske sreće u budućnosti i sigurni smo da će nas obradovati još mnogo puta u nastavku svoje karijere!*



## ZAVIRITE U DRUŠTVENE MREŽE OK BiH (klikom na sliku)



Pratite nas na društvenim mrežama:  
(klikom na ikone)



©2022. Olimpijski komitet Bosne i Hercegovine. Sva prava zadržana.  
[www.okbih.ba](http://www.okbih.ba)

Specijalnu zahvalnost dugujemo sponzorima i partnerima OK BiH.  
Klikom na logo posjetite njihove oficijelne stranice.




IN MEMORIAM

# MIRZA DELIBAŠIĆ “KINĐE”

## MIRZA DELIBAŠIĆ

Tuzla, 09. 01. 1954.



  
Olimpijske  
medalje



**Košarka**

### Klubovi

- Sloboda Tuzla
- Bosna Sarajevo
- Real Madrid Španija

08. decembra prije 21 godinu preminuo je Mirza Delibašić, najbolji sportista Bosne i Hercegovine svih vremena.

Za “Studente” je odigrao gotovo 700 utakmica i postigao približno 14.000 koševa.

Bio je prvak Jugoslavije (1978. i 1980.), klupski prvak Evrope 1979. godine, a sa reprezentacijom bivše države osvojio je sve moguće trofeje. Dva je puta bio šampion Starog kontinenta (1977. i 1979.), prvak svijeta 1978. godine i olimpijski pobjednik 1980. godine.

Za najboljeg košarkaša SFRJ proglašen je 1980. godine.

Četiri je puta biran za najboljeg sportistu Bosne i Hercegovine, a 2000. godine proglašen je sportistom svih vremena u BiH.

Bio je selektor košarkaške reprezentacije BiH koja je 1993. godine na Evropskom prvenstvu osvojila osmo mjesto. To je i dalje najbolji plasman bh. državnog tima na europskim takmičenjima.

Mirza Delibašić nas je napustio 08. decembra 2001. godine u Sarajevu, ali njegova djela ostaju trajno utkana u sportsko nasljeđe Bosne i Hercegovine.